



KEMENTERIAN PERTANIAN DAN KETERJAMINAN MAKANAN

Ministry of Agriculture and Food Security

Wisma Tani

No 28, Persiaran Perdana, Presint 4

Pusat Pentadbiran Kerajaan Persekutuan

62624 PUTRAJAYA,

MALAYSIA


No. Telefon : 03-8000 8000

No. Faks : 03-8888 6020

Laman Web : www.kpkm.gov.my

KENYATAAN MEDIA

MAKLUM BALAS BERHUBUNG BERAS GANU myGAP



PUTRAJAYA, 9 SEPTEMBER 2023 – Kementerian Pertanian dan Keterjaminan Makanan (KPKM) ingin memberikan pencerahan berhubung "**Beras Ganu myGAP**". Untuk makluman, program persijilan myGAP merupakan program yang dilaksanakan oleh Kerajaan Persekutuan melalui Jabatan Pertanian Malaysia (DOA) di seluruh negara. Perkataan MAFI pada bungkusan tersebut merujuk kepada KPBM.

myGAP bermaksud *Malaysia Good Agricultural Practices / Skim Pensijilan Amalan Pertanian Baik Malaysia*, ia merupakan skim pensijilan yang dirangka dan dilaksanakan sejak tahun 2002 untuk mengiktiraf ladang yang mengamalkan amalan pertanian baik bagi mengeluarkan makanan yang selamat dan berkualiti, menjaga keselamatan alam sekitar, serta menjamin keselamatan dan kebajikan pekerja. Objektif program myGAP adalah untuk meningkatkan bilangan petani supaya mengamalkan amalan pertanian baik dan diberi pengiktirafan supaya menghasilkan pengeluaran ladang yang selamat dan berkualiti di samping memelihara alam sekitar serta menjaga keselamatan dan kebajikan pekerja.

Sehingga kini, keluasan tanaman padi di negeri Terengganu yang mendapat pensijilan myGAP berjumlah 908.70 hektar dari keluasan 12,000 hektar. Pelbagai Jabatan/Agensi di bawah KPKM seperti Jabatan Pertanian Malaysia (DOA), Kawasan Pembangunan Pertanian Bersepadu Terengganu Utara (IADA KETARA), Kawalselia Padi dan Beras (KPB) dan Lembaga Pertubuhan Peladang (LPP) terlibat dalam Program Beras Ganu myGAP. Para pesawah yang terlibat hanya memperolehi insentif upah mesin padi RM8.00/per guni (85 kg) pada tahun 2021 dan RM9.00/per guni (85 kg) pada tahun 2023 sumbangan Kerajaan Negeri. Ini adalah sebagai tambahan kepada bantuan yang diberikan oleh Kerajaan Persekutuan bagi insentif tanaman padi melalui pemberian subsidi input seperti benih padi sah, baja, racun, bajak, kapur dan subsidi output Skim Subsidi Harga Padi (SSH) berjumlah hampir RM1.63 bilion setahun di seluruh negara termasuk di Terengganu.

Manakala dari segi penghasilan beras Ganu myGAP pada tahun 2021, sebanyak 450 metrik tan berjaya dihasilkan dan hanya merupakan 6% dari bekalan beras di pasaran Terengganu. Untuk rekod, tahap sara diri (SSL) bagi beras di Terengganu pada tahun 2022 adalah 56% ekoran bencana banjir luar jangka yang berlaku dan bukannya 78% seperti yang dilaporkan oleh sesetengah pihak.

PEJABAT YB MENTERI

KEMENTERIAN PERTANIAN DAN KETERJAMINAN MAKANAN

9 SEPTEMBER 2023